

ALAHADY 01 fiaviana TAONA – D



« Miandrindrà ka asandrato ny lohanareo, fa efa akaiky ny fanavotana anareo »

Ry Kristianina havana, nankalaza an'i Kristy mpanjaka isika tamin'ny Alahady lasa teo izay namaranantsika ny taona litorjika ary amin'izao Alahady hamaranantsika ny volana novambra izao ka mampiditra antsika amin'ny taoana litorjika vaovao dia I Md Lioka no Evanjely ho banjinintsika manokana amin'ity taona D ity. Md Lioka izay mampisongadina bebe kokoa mikasika ny

famindrampon'Andriamanitra sy i Masina Maria. Mandritra ny taona isika no handalina izany. Faly sy ravo miarahaba antsika amin'izao taona vaovao litorjika izao izay taona ho entintsika Olo Araiky Jiaby, Fratelli Tutti miatrika izao Sinaodin'ny diosezy izay miara-dalana amin'ny diosezy eran-tany : Eglizy Miara-dalana, Eglizy Olo, velomin'ny Batemy ka miombona mandray an-tanana, ka

zary Iraka Tabernakla velona. Ny tanjona araka ny voalazantsika mba ho fiaingana vaovao, Pantekoty Vaovao ho an'ny diosezintsika. Ny irina dia ho samy ho "OLON-DEHIBE AMIN'NY FINOANA isika ka na dia mafy ny rivotra mety handrendrika dia tsy matory ny finoantsika fa mandroso hatrany ny sambom-piainantsika. Mivahatra amin'I Kristy ka zary kristianina velona satria ny teny hoe Kristianina dia avy amin'i Kristy ka tahaka an'I Krsty isika kristianiana tsy hoe mpitory Vaovao

Vakiteny I : Jer. 33, 14-16

Tononkira : Salamo 92

Vakiteny II : 1 Tes. 3, 12 — 4, 2

Evanjely : Lk. 21, 25-28. 34-36

mahafaly fotsiny fa mpamafy fiadanana sy fanantenana—amin’ny toerana rehetra misy antsika amin’izao andro sarotra izao.

Izany no ezaka tsy maintsy ataontsika ka mampirisika antsika hirotsaka bebe kokoa amin’ny fanantanterahana izao Sinaody izao izay fotoana hifampitraofana. Antsoina isika jiahy na dia ireo tsy vita batemy aza. Izao ny fotoana hifampihainoana, hifampitandrinesana ka hiezaka hamaky ny zavamisy eo amin’ny fiainantsika isika, izany hoe ireo mandrafitra ny fifandraisana amin’ny zava-boary, eo amin’ny isika samy isika, ary ny fifandraisana amin’Andriamanitra. Ny tanjona dia ny hirosoana lalindalina kokoa amin’ny fiombonana ka hahatonga antsika ho tena mpandray an-tànana. Mitaky fiovam-penitra mahery vaika “changement radical de comportement” ny vokatry ny fibebahana. Ny manosika antsika haneho izany fibebahana izany dia ny firotsahana eo anivon’ny fiaraha-monina mba ho TABERNAKLA VELONA mitondra an’I Kristy. Isika no Kristy Mpiarabelona amin’ny olona amin’izao.

Izao taona litorjika vaovao izao no angatahintsika ny tsodranon’Andriamanitra sy ny fahasoavany hahatonga antsika ho génération des bâtisseurs, ho taranaka mpanorina, ho EOY, ho Eglizy Olo velomin’ny Batemy ka zary Tabernakla velona. Hanomanantsika ny fiavian’I Kristy izany rehetra izany.

Fiaviana no iantsoantsika ny AVENT, raha dinihina dia misy fomba fiatrehana izany fiaviana izany, averimberintsika matetika fa ny fankalazana ho antsika dia tsy hoe mahatsiaro fotsiny fa mivelona no sady miaina noho ny asan’ny Fanahy Masina. Misy ny fomba telo azo hiatrehana ny AVENT .

Ny fiaviana voalohany izay velomin’ny Tenin’Andriamanitra hiainantsika eo anivon’ny Eglizintsika izay mahatonga antsika mamerimberina fa sady mamaky no mivelona ny Tenin’Andriamanitra isika, ho mpanambara ny tenin’Andriamanitra isika amin’ny fiainantsika. Na dia efa 2000 taona lasa aza ny fiaviana omanintsika amin’izao avent izao dia eto anivontsika tokoa ny Tompo ary mivelona amin’ny alalan’ny sakramenta sy ny teniny isika.

Ny fiaviana faharoa dia amin’ny alalan’ny Tenin’Andriamanitra sy Sakramenta ka hiainantsika amin’izao fotoana izao. Ireo no mamelombelona ny fiainantsika ka mahatonga antsika ho Kristy mpiara-belona, ho Kristianina, ho taranaka mpanorina tokoa.

Ny fiaviana fahatelo dia ilay amin’ny hoavy izay hibanjinintsika amin’ny alalan’ireo vakiteny atolotry ny Eglizy amintsika amin’izao Alahady voalohany amin’ny Fiavian’ny Tompo izao , izao Avent izao- Jesoa ho avy amin’ny fomba manetriketrika.

Ny tenin’Andriamanitra voalohany bokin’i Jeremia mpaminany : *“Amin’izany andro izany, sy amin’izany fotoana izany, hampitsimoka solofo marina ho an’i Davida Aho, izay hitsara araka ny hitsiny sy ny rariny amin’ny tany. Amin’izany andro izany i Jodà, hovanjena ary i Jerosalema handry feizay, ka hantsoina hoe: Tompo-fahamarinantsika.”* Tsy iza io voalaza io fa I kristy Tenin’Andriamanitra. Ny fiaviana dia ao anatintsika, ao am-pontsika ao ny Tenin’Andriamanitra mitsiry ka mivelatra, rehefa mivelatra izy dia mahatonga antsika ho mpanorina izany hoe hametraka izany fanjakan’Andriamanitra izany eo anivon’ny fiainantsika andavanandro ka ho tanteraka ilay Jerosalema. Fantantsika fa Jerosalema dia ilay tanana masina, tananan’ny fiadanana. Rehefa tonga eo anivontsika I Jesoa dia tanteraka ilay Jerosalema satria mivelatra ny fiainantsika miaraka amin’I

Jesoa ka zary fiadanana sy masina ny fiainantsika. Izany ny faniriansika hahatonga antsika ho taranaka mpanorina. Ambaran'i Jesoa ao amin'ny Evanjely fa efa akaiky tokoa ny fanavotana satria rehefa mitsimoka ao amintsika i Jesoa ka mivelatra izy dia tanteraka eo amintsika ireo fanavotana ho entin'i Jesoa izany. Tsy fanavotana arak'izao tontolo izao fa fanavotana mitondra fiadanana, mitondra hafaliana, mitondra hasambarana sy fiombonana ka izany no fanavotana ho antsika satria zary fianakaviana iray ao amin'Andriamanitra isika satria Olo Araiky ao Aminy ka Izy manafaka antsika amin'ny loza rehetra. Raha tiantsika izany dia fanantenana no ambaran'ny fankalazana ny "Avent". Feno fanantenana isika satria Andriamanitra tsy lavitra intsony ny Andriamanintsika, eo anivontsika izy mitantana antsika. Izany no ambaran'I Md Paoly amin'ny vakiteny faharoa ho an'ny Tesalosanina *"Hankahery ny fonareo anie Izy, ary hiaro azy tsy hanan-tsiny amin'ny fahamasinana eo anatrehan'Andriamanitra Raintsika, ho amin'ny fahatongavan'i Jesoa Kristy Tompontsika mbamin'ny olomasiny rehetra. Amen."*

Izany fankaherezana izany no manosika antsika handresy ireo mety ho misakana ny fahatongavan'ny Tompo, eo anivontsika araky ny fantantsika dia ny fahotana. Io no vato misakana voalohany. Izao fotoana izao no andro tsara andresentsika ny fahotana izay manapotika ny fiainantsika, manapotika ny tontolo iainantsika. Matetika isika tsy miraharaha ny zava-boahary manodidina antsika ka hanao ezaka isika amin'izao Avent izao hanarina ny tontolo iainana mba ho mpanorina ny tontolo iainana vaovao mba ho diosezy maintso tokoa araky ny averimberina. Izao fotoanan'ny mahalegny izao no fikarakarantsika izany, izao fotoana izao no manampy antsika handray ny Tompo izao vanimpotoana ny fiaviana izao. Manomboka amin'izao sinaody izao, hanambarantsika fa vonona tokoa amin'ny fiovam-penitra mahery vaika, changement radical de comportement dia aoka isika samy vonona hiaro ny zava-boary, ireo ala kely manodidina antsika. Sady hiaro isika no sady samy hiezaka hamboly kakazo mba ho diosezy maitso tokoa ny diosezintsika. Anisan'ny fiomanana amin'ny fahatongavan'ny Tompo ny fiarovana ny zava-boary.

Eo koa ny fahotana manapotika ny tontolom-piainantsika dia ny lainga, ny fitapitaka, ny tsy fahaizana mampanjaka ny rariny sy ny hitsiny eo anivon'ny fiaraha-monina sy ny fianakaviana, ka izao Avent izao no aoka hanampy antsika hanarina ny fiainantsika. Milaza miara-mahita isika fa tena potika tokoa ny tontolom-piainantsika. Tena mikiky ny fahantrana. Manomboka eo anivon'ny fianakaviana isika no manavao ny tontolom-piainantsika mba ho tontolo misy an'Andriamanitra, fampanjakana ny rariny sy ny hitsiny, ny marina, ny fifankatiavana, ny fihavanana marina tsy misy fitaka dia ho tena taranaka mpanorina tokoa isika.

Eo koa ny tontolom-pinoana anjakan'ny fahotana, manapotika ny ain'Andriamanitra isika, mamono ny aina isika. Andriamanitra mamelona ka amin'izao fiomanana amin'ny Avent fiavian'ny Tompo izao dia enga anie ny fanantenantsika, ny hery nomen'Andriamanitra antsika amin'ny alalan'ny fibebahana ataontsika hirosoantsika bebe kokoa amin'ny fiainam-baovao entin'izao fiavian'ny Tompo izao. Samia isika hahay hanararaotra izao vanim-potoanan'ny Avent izao mba hihavao tokoa ka ho feno fanentanana ny fontsika, ho fenoin'andriamanitra ny fitiavany ny fontsika ka ho fiainam-baovao ao amin'I Kristy tokoa ny fahatongavany.

Taombaovao litorjika isika. Hamakivavaky ity taona vaovao isika. Enga anie ho volentsika fivavahana sy fandalinam-pinoana araka ny lohahevitra manentana antsika amin'izao taona voalohan'ny

Sinaody izao. Mankahery antsika ary mitso-drano antsika jiaby, isika EOJ jiaby mba ho Eglizy Olo velomin'ny Batemy isika ka ho TABERNAKLA VELONA.

Efa eto amin'izao tontolo izao ianao ry Kristy ary fantatray izany eo anivon'ny Eglizy. Ianao no banjininay sy raisinay amin'ny alalan'ny Teninao sy ny Sakramenta ka ampio izahay hahay miomana bebe kokoa amin'izao dianay mankany amin'ny Noely izao, hitombo fitiavana izahay, hampanjaka ny marina izahay, handresy ny ratsy ka mba ho taranaka mpanorina tokoa, mpanorina Eglizy Tranon'Andriamanitra ary ho Eglizy Olona velona izahay eo anivon'ny fiainanay andavanandro, eo anivon'ny fiaraha-monina. Miara-miatrika izao sinaody izao izahay ka mitodika aminao. Arotsahy ny Fanahy Masina hanoro ny marina amin'ny dinika ataonay. Fantatrao ny fahalemenay, ka aza avela hiorim-paka ny fanakorontanana eto aminay. Aoka izahay handresy izay mety hitarika anay amin'ny lalan-dratsy sy fitsitokotokoana. Aoka hahay hiombona ao aminao izahay ka hiara-mizotra mankany amin'ny fiainana hahitana ny fivelarana ny mahaolona manontolo sy ny olon-drehetra. Masina Maria Reny manomboka izao taom-baovao izao izahay ary miatrika izao sinaody izao ka tantano ny dianay ho any amin'I Jesoa, ampio izahay hahay handray Azy tahaka anao. Md Josefa Ray Mpiaro ny Eglizy erantany, Mpiaro ny fianakaviana masina mivavaha ho anay mba ho eglizy tokoa ny fianakavianay ka hiara-mivavaka sy hiara-mandalina ny finoana. Amen

Mompera Arseveka Mgr Benjamin Ramaroson